

籌辦夷務始末

卷十七之十八

籌辦夷務始末卷之十七

道光二十年庚子十一月丁亥。暫護兩廣總督廣東巡撫
怡良奏。臣於本月十八日。承准軍機大臣字寄。道光二十
年九月初四日奉

上諭。據托渾布奏。暎夷船隻。前由東省外洋。北赴天津。共有夷船
八隻。現在夷船五隻。已開帆南駛。其三隻亦由外洋先回。該夷
情形極為恭順等語。暎夷船隻。現俱起碇南旋。恐沿海將軍督
撫等。不知現在情形。特此飛示耆英。裕謙。怡良。知悉。並著詳加
酌覈。將前調防守各官兵。分別應留應撤。妥為辦理。托渾布摺
片。著鈔給閱看等因。欽此。查虎門內外各隘口。兵勇共有萬人。

督臣林則徐前次奉到

諭旨。當即會同臣將次要口隘各兵陸續撤減二千餘名。臣復移咨水陸各提鎮。將各路中可以撤減者。再為酌覈情勢。分別撤減。以節糜費。惟該夷等犬羊之性。反覆不常。跡其詭譎之端。實已無所不至。此時雖經就撫。仍當防於未然。所有緊要水陸各口隘。照前小心防範。不敢稍形疏懈。聽候欽差大臣琦善到粵籌辦。

硃批知道了。

欽差大臣協辦大學士兩江總督伊里布奏。竊夷目懿律前次呈遞夷書。擬於本月十六十八等日。起程赴粵。當經等恭摺

具奏。一面給與回文。詢以義律嗎嚙嚙諸夷。是否偕往。留在定海者。又屬何人。令其逐細具覆。旋於十五日。接據懿律覆稱。該夷定於十九日。與義律嗎嚙嚙等。率兵三千人。乘坐大戰艦三隻。餘船數隻。至粵聽候查辦。將頭目胞詛。及布爾利。留在定海。日後儻有查詢之事。即懇向胞詛關會。又向差弁聲稱。伊此次赴粵。須_努給與文書。向琦善咨明。以便伊前往投到等語。_努查該夷所請給咨赴粵之處。正其馴順畏服之意。自應准行。當即繕發給文。令其帶往投遞。一面由陸飛咨琦善知照。旋又差弁前往探明懿律等。實於十九日早。帶領兵船八隻起碇。由外洋而去。_努伏

查該夷在浙之船共計四十餘隻。內兵船商船各半。其在浙久駐者止有三十餘隻。餘船則時在閩粵等省。往還去來無定。該夷前已撤去六隻。今又續撤八隻。是在浙久駐之船所撤已及一半。且以人數覈計。該夷抵浙之初共有七千餘人。後因水土不服。疫癘大作。病斃者約數百餘人。統計在浙之兵不過六千餘人。今又撤去三千。與一半之說亦相符合。該夷航海前往約計五六日即可抵粵。其時琦善亦已抵彼。正可相機查辦。至該夷兵船既已撤去一半。所有浙江防兵自應酌量裁撤。除_粵前調壽春鎮兵一千二百餘名應即全數撤退。令該鎮王錫朋帶領回鎮。又

福建提臣余步雲所帶之福甯鎮兵五百餘名。亦即全撤
外。其本省官兵。調至鎮海等處防堵者。共計七千九百餘
名。桴與余步雲及浙江提臣祝廷彪。逐加籌畫。酌留各營
精銳兵三千五百餘名。連鎮海營額設兵九百餘名。陸續
招回定海鎮兵一千餘名。統計兵五千四百餘名。以口岸
之大小。分駐兵之多寡。業已足資防守。餘兵四千四百餘
名。及調赴乍浦防堵之嘉湖等協兵七百名。亦一併陸續
撤退。以節糜費。又甯波乍浦等處。商船薈萃之區。其沿海
貧民。又多以採捕為業。舵工水手漁戶人等。實繁有徒。自
六月間封港以來。迄今五月有餘。商漁失業。生計維艱。現

在夷船雖未全退。惟該夷前次來文。聲明不敢向商漁滋擾。其言甚為切實。不致爽約。自應即行開港。俾令各謀生業。仍飭各海口員弁。認真盤詰。不准將異言異服之人。夾帶進內。以免疏虞。而杜他釁。

諭軍機大臣等。伊里布馳奏。喚夷起碇赴粵一摺。覽奏已悉。此次夷目懿律等。於十月十九日。帶領兵船。請咨赴粵。該大臣將前調防兵。酌量撤退。商漁船隻。照舊開港。均著照所議辦理。惟該夷撤兵已及一半。尚有留住定海之人。該大臣所留各營防兵。按照口岸分駐。仍須加意防守。不得因該夷漸次撤兵。少形疏懈。至商漁船隻。照常出入。雖據該夷聲明。不敢滋擾。仍著嚴飭。

海口員弁認真查察。毋致別滋事端。

又

諭。御史曹履泰奏。粵東澳門。傳有舟山夷人私信。請飭確探一摺。如果此信屬實。是該夷於占據定海之後。既無居民同住。又無食物可買。且水土不服。患病甚多。勢必不能久住。惟係貿易私信。未可憑信。著伊里布派員確探。是否有此情形。相機籌辦。原摺鈔給閱看。

又

諭。伊里布馳奏。夷船業已起碇赴粵一摺。據稱差弁探明懿律等。實於十月十九日早。帶領兵船八隻。起碇由外洋而去。連前所

撤六隻。合計在浙久駐之船。所撤已及一半等語。該夷起碇赴粵。係為求通貿易起見。自應將定海兵船全數撤退。何以仍留兵船一半。在彼占據。著琦善到粵後。向該夷究詰。是何意見。隨時相機妥辦。伊里布摺鈔給閱看。

已丑

欽差兵部尚書祁寯藻刑部右侍郎黃爵滋奏。竊臣等於九月初二日。常州途次。承准軍機大臣字寄。八月二十四日奉

上諭。前據鄧廷楨奏。廈門攻擊夷船。護參將陳勝元。刺中白夷身死。烏槍擊中夷人二名落海。其餘中傷夷人甚多。當即明降諭旨。將陳勝元以都司儘先陞用。賞戴花翎。其在事出力之蔡觀

龍顧教忠。胡國榮。金光耀。陳光福。林建猷。魯思仁。何有時。興貴等。俱分別施恩矣。著祁寯藻。黃爵滋。於浙江審案完竣之後。馳赴廈門。密傳該處鄉民。及未與是役之微員兵丁等。詢以六月初間。夷船駛至廈門。彼時情形如何。究係孰先開礮。如何接仗。該夷傷亡若干。我兵有無傷損。其船隻何時駛至。分起傳訊。毋令串通。並密傳提督陳階平。諭以現奉密旨。傳訊該提督。廈門一役。情形虛實若何。該提督本係局外。不妨據實一一縷陳。毋稍瞞隱。干咎。並詢以始而告病。繼而銷假。此中有無隱情。或別有齟齬之處。均著詳細登答。將來覆奏時。我等自得之探訪。斷不致將汝牽涉。該大臣等照此辦理。似可盡得實情。據實入奏。

各等因。欽此。臣等遵即折回迅速前進。於十月初八日。馳抵廈門。當即親赴海口接仗地方。徧行察看。密傳該處鄉民張忠等十四名。督同司員隔別詢問。據供本年六月初四日午後。有三桅夷船一隻。旁繫杉板小船。由青嶼口門駛入內港。至大礮臺對面之嶼仔尾停泊。初五日巳時。那杉板夷船。駛到岸邊。夷人說要上岸。那時文武官員。說提督道臺。均不在衙門。不敢作主。夷人說不叫上岸。就要打仗的話。亂罵起來。官兵向他攔阻不聽。武官們先放一箭。射死夷人一名。又用長矛刺死上岸夷人一名。兵丁施放鳥槍。那三桅夷船。即開大礮打來。打死兵丁九名。並民婦

陳黃氏一口。民房被礮子穿破者。約有一二十間。礮臺亦有損傷。官兵亦即開礮打去。夷人有被打傷。跌入艙內的。也有落海死的。看不清楚。不知多少人數。是日打仗。約有三箇時辰。夷船駛出口外去了等語。臣等隨於該處防守弁兵內。摘傳未與是役之世職守備曾侍堯。額外外委蘇陽珍。陳威陽。效用林石泉。王樹勳。潘建中。王萬年。兵丁馬揚求。吳占生。洪勝芳。張捷生。馬定國。周連華等。分別詢問。彼時接仗情形。究係孰先開礮。據供官兵實因攔阻夷人上岸不聽。陳光福始用箭射死夷人一名。我兵開放排槍。陳勝元又用長矛刺死上岸夷人一名。夷船隨即開礮。彼

此轟擊。復訊以該夷傷亡若干。我兵有無傷損。夷船何時駛去。據供除鳥槍擊中夷人二名落海外。其餘礮擊夷人或跌倒艙內。或落海身死。不知確數。我兵實係傷斃九名。受傷十四名。並傷斃民婦一口。此外並無傷損。夷船自己時至未時。始行退出口外。旋即駛去。覈與鄉民等所供脗合。復傳訊該處地保陳復源等。並據捐貲防堵招募義勇之鄉紳。候選員外郎林國華。中書科中書吳匡材。舉人呂世宜。監生林書等來見。面詢彼時情形。逐層細訪。僉稱無異。臣等復遵

旨密傳水師提督陳階平。將廈門一役情形虛實。令其據實縷陳。

據該提督親供。六月初間廈門接仗情形。頗為詳悉。覈與鄉民弁兵人等供詞。均屬相符。其告病銷假一節。據稱實因失跌傷腿。日久未愈。時因督師在洋。咨請總督代奏。仍力疾照常辦公。繼蒙

天恩賞假調理。不敢以犬馬微患。上塵

聖慮。是以即請銷假。實無隱情。亦別無齟齬之處。現在步履如常。跪起尚未能靈便等語。臣等再三開導。恐其或有未盡。該提督始終一詞。似無疑義。

祁寯藻黃爵滋又奏。再臣等查勘廈門海口。東南一帶。青嶼。浯嶼。大擔。小擔。各口以外。均係外洋。口內迤北。自安海

汛。水操臺。頭巾礁。至大礮臺。均係逼近廈門內港。其南岸
嶼仔尾。與大礮臺斜對。最為扼要。中間迤西。有古浪嶼。橫
踞港中。與礮臺嶼仔尾有犄角之勢。礮臺之西。即係十三
路頭。商賈輻輳之地。民居市廛。直連港面。是廈門防禦。以
青嶼。大擔。各口為外洋。安海汛。至大礮臺。為內港。一過礮
臺。即無險可守。此兩次接仗官兵。併力堵截夷船。不使其
衝過礮臺之實在情形也。現在水師提督陳階平。興泉永
道劉耀椿。於沿海港面。層層防守。尚屬周密。欽遵

諭旨。該夷船隻經過停泊外洋。斷不敢先開槍礮。其內港布置。亦
不敢稍形鬆懈。蓋廈門為全閩之咽喉。泉漳之保障。形勢

尤關緊要。自七月後。夷船並未駛入口內。民情安堵。堪以仰慰。

聖鑒。

諭軍機大臣等。祁寯藻等奏。遵查廈門接仗情形一摺。此案既據該尚書等密傳該處鄉民。及未與是役之弁兵。捐資招募之紳士。分別訊問。並據水師提督陳階平。呈遞親供。均相符合。著毋庸議。其另片奏。廈門防守情形。覽奏已悉。惟本日據吳文鎔奏。報護督日期摺內。有閩洋夷船。尚未全行南駛之語。該尚書等。尚有續查事件。計此時接奉諭旨。當已折回閩省。該處洋面。現在有無夷船停泊。自必確有見聞。著查明據實具奏。

癸巳

欽差大臣協辦大學士兩江總督伊里布奏。竊於本月二十三日。承准軍機大臣字寄。道光二十年十月十五日奉

上諭。本日伊里布奏。專弁前往定海。詢悉夷情一摺。此項差弁。與該夷目等見面。是否在定海城中。抑在該夷船上。原奏未經聲敘。其定海居民。現在是何景象。該夷船隻。是否仍前占據要隘。該弁等既經前往。自必目擊情形。著伊里布詳詢該弁。據實奏聞。至該夷等所呈各物。該大臣奏稱。恐生疑貳。收貯充賞等語。甚屬非是。著嚴行申飭。天朝大臣。斷無收受外夷餽獻之理。即將原物卻退。正見馭夷體統。有何疑貳。現在收貯各項。如未經